

Ivo Komšić

## BIOGRAFIJA

Dr. Ivo Komšić je rođen 16. 6. 1948. godine u Kiseljaku, Republika Bosna i Hercegovina. Osnovnu školu i gimnaziju završio u Kiseljaku, a Filozofski fakultet – Odsjek za filozofiju i sociologiju u Sarajevu. Na Filozofskom fakultetu u Sarajevu magistrirao 1977. godine sa temom *Pojam prirode i povijesti u Hegelovom i Marxovom djelu*. Na istom fakultetu doktorirao u lipnju 1985. godine na temi *Dijalektika robnog oblika* (Pretpostavke dijalektike diskontinuiteta u Marxovom *Kapitalu*).

Dr. Ivo Komšić je radio kao profesor filozofije i sociologije u gimnaziji do 1977. godine, zatim kao asistent na Mašinskom fakultetu na *Sociologiji* kao općem predmetu do 1979. godine.

Nakon toga prelazi na Filozofski fakultet gdje ponovno biva biran za asistenta na predmetu *Sociologija rada i politike*. U nastavničko zvanje docenta biran je 1986. godine, u zvanje vanrednog profesora 1990. godine, a u zvanje redovnog profesora 2000. godine. Bio je urednik u časopisu za filozofiju i društvenu teoriju *Dijalog*, Sarajevo, zatim predsjednik Udruženja za sociologiju BiH.

Na prvim demokratskim izborima u BiH 1990. godine, Ivo Komšić je sudjelovao u izboru za člana Predsjedništva RBiH kao kandidat Socijaldemokratske partije (SDP). Početkom agresije na Republiku BiH 1992. godine, privremeno radi u Ministarstvu obrane kao dobrovoljac, nakon toga, blokada Sarajeva ga zatiče u rodnom Kiseljaku gdje se priključuje radu humanitarne organizacije „Caritas“. Pred eskalaciju rata u srednjoj Bosni, 12. 4. 1993. godine, sa grupom hrvatskih intelektualaca utemeljuje u opkoljenom Sarajevu Hrvatsku seljačku stranku BiH i postaje njen predsjednik. S djelatnošću ove Stranke formira se alternativna hrvatska politika u BiH koja se zalaže za očuvanje cjelovite RBiH i suživot Hrvata na cijelom prostoru ove zemlje sa drugim narodima. To je značajno utjecalo na popuštanje zategnutosti u toku oružanih sukoba Armije BiH i HVO-a.

Početkom novembra 1993. godine, nakon raspada Predsjedništva RBiH, a temeljem izbornih rezultata iz 1990. godine, postaje i član Predsjedništva RBiH.

Dr. Komšić je jedan od organizatora Općeg Sabora Hrvata Bosne i Hercegovine, održanog 6. 2. 1994. godine, i predsjednik je Hrvatskog narodnog vijeća. Ovaj Sabor je usvojio mirovni plan, na temelju koga je nastao Vašingtonski sporazum i uspostavljen mir između Hrvata i Bošnjaka u BiH. – Prof. Komšić je bio autor nove konstitucije BiH zasnovane na federaciji kantona, sa precizno utvrđenim brojem kantona, njihovom teritorijom i brojem stanovnika.

Dr. Komšić je sudjelovao u gotovo svim mirovnim pregovorima o Bosni i Hercegovini.

Prof. Komšić je ugledan naučni radnik i nastavnik Univerziteta u Sarajevu, te veoma aktivan u javnom i političkom životu.

Od 2000. do 2002. godine bio je na funkciji predsjedavajućeg Doma naroda Parlamenta Federacije BiH. Od 2006. do 2008. godine zastupnik je u Skupštini Kantona Sarajevo i u Domu naroda Parlamenta Federacije BiH.

Prof. dr. Ivo Komšić je autor četiri knjige (Dijalektika robnog oblika, Automatizacija i humanizacija, Preživljena zemlja – Tko je kada i gdje dijelio BiH, Socijalna moć uma), zatim nekoliko stotina znanstvenih i stručnih radova prezentiranih na domaćim i stranim naučno-stručnim skupovima i objavljenih u časopisima i posebnim publikacijama.

Ivo Komšić